



續修經小卷



續修楓涇小志卷六

志人物

里人程兼善達青重纂

列傳下

陳孝泳字廣言號楓崖以妻籍補博士弟子員工篆隸精金石之學當世比之薛尚功趙明誠輩遊京師公卿交重之乾隆十年詔修西清古鑑求能識古文奇字者參與討論以冢宰汪由敦薦得入內廷校閱昕暮趨直鉤考審視不爽毫髮每奏篇輒當上意十七年舉順天鄉試七上春官不第西清古鑑成大臣奏留供奉懋勤殿尚書裘曰修薦為國子監學正進助教擢戶部主事三遷至陝西道監察御史丁憂奉旨仍在內廷行走服闋擢兵科給事中遷鴻臚寺

楓涇小志

卷六

人物

少卿特命同南書房翰林行走其謝表琢句甚工有云舉頭黃榜昔思成進士之難聯步青雲今獲從翰林之後一時傳誦當世榮之改通政司參議擢副使陞光祿寺卿以疾解任奉旨著陳世倌前往診治四十四年卒於京寓年六十五當侍直內廷時凡奏御筆札用篆隸八分者多俱奉敕書進至內府儲藏法書名畫鐘鼎法物詔下詞臣審覆得孝泳一言為定子晉聞父病七晝夜抵京師扶柩歸

里晉官南平知縣

續修楓涇小志卷六

吳本禮字禹門見義勇為建宗祠置祭產戚友之婚喪無力者輒飲助之有良家子以貧鬻女償其值為擇配士族壽八十三子烜之乾隆壬子舉人官湖州府教授

續修楓涇小志卷六



胡世培字藥亭國學生工詩喜孫吳家言年未冠挾策走燕齊  
有俠士風以剛直構禍戍山海關期滿赦回適厄魯特蠢動  
有以胡生知兵聞於軍府遂隸大帥麾下凱旋題敘以母老  
固辭既歸吟詠自得築蕉園以居著有蕉園詩鈔曹小志  
汪墉字廷珍號月槎乾隆癸酉順天舉人官嶧縣教諭擢漢陽  
令解組歸濬市河力任其事平生耽吟詠時與謝垣陳孝泳  
相倡和著有月槎吟稿

葉伯圭字次鷗號秋嶼好讀書工吟詠遊北雍與陳孝泳謝垣  
汪墉輩以詩酬唱名譽播公卿間卒無所遇歸後歿於家年  
僅三十曹小志

許世墉字邦千乾隆丙子舉於鄉年甫弱冠癸未成進士性侗

楓涇小志

卷六

人物

二

儻負經世才淡於仕進事嗣母葉盡孝生平篤友誼有故舊  
歿貧無以殮解囊賻之并理其喪接人抑然自下與遊者幾  
忘其爲華胄卒年三十六懷才未展人共惜之善志

吳燦字錦川號鷗村庠生考授布政司經歷少有至性父梓禮  
中暑疾思食瓜與橄欖醫禁弗與及卒唇齒焦灼燦見二物  
輒淚下有士人後貧將鬻女燦厚卹之得弗鬻時同善會經  
費絀燦支持二十餘年善志

顧曰嚙字蘊高號勁庵乾隆庚辰舉人授儀徵令廉靜愛民以  
公誤離任遂拂袖歸有答友詩云七年奔走違當路兩袖歸  
來欲杜門其志趣可見孫漢字槎洲嘉慶己卯舉人任奉化  
教諭鄉民有抗糧滋鬧者奉檄徧歷窮鄉撫慰得無事卒於



任著有南松學吟闌干詩鈔

陳蘭徵字香王號澹齋乾隆庚辰順天舉人授永瀋令歷署州縣十二任所至有善政署興安時有奸獄犯婦俟產行刑過期不產部文行查或議報產堅持不聽署橫州時山水成災發倉賑饑未幾邊西荒歉請上官出倉穀五萬石平糶全活無算擢永甯州署柳州府丁艱服闋選山東平度州以前署任內失察降補館陶令其地爲漳衛交匯蘭徵指陳形勝請帑濬築水不爲患卓異陞濱州知州引疾歸著有粵遊吟樹香齋詩鈔

嘉府志節董誥撰行狀

顧人文字質均號闍村附監生持躬端謹無戲言惰容績學能文屢試不售考授主簿子之葵之葢之芳俱有傳

善志

楓涇小志

卷六

人物

畢鎮字紹安號甘園誼從弟乾隆丙戌進士官潁州府教授工詩善駢體文董蔗園相國其及門高弟也子銀濤姪蘭舟皆有聲庠序

沈映暉字朗乾號雅堂廩貢生有文名善畫山水夢神授五色石子吞之藝益工乾隆乙酉召試獻詩畫冊取第一供奉內廷屢稱旨品爲書生畫己酉繪西清古鑑冊御題繪林薈美四字庚寅萬壽節進九峯三泖圖選列石渠寶笈四入北闈不售前後錫賚優渥辛卯以子步垣舉順天鄉薦并呈闈墨謝賜披覽癸巳予告旋里丙午步垣官部曹迎養入都八月又進祝釐冊收置熱河越八年卒其遭際之隆人盡榮之



陳飛魚字喬年婁庠生家貧力學魏塘丁卓峰侍御鄉居時集知名士爲文社每屆期飛魚自鎖赴社嘗徒步往還寒暑不輟年未及壯賈志以歿

林木臣字泓亭婁邑歲貢生書法秀勁博學能文慕張觀之爲人築室於硯子墳旁年六十作辭世詩一絕而卒相傳卒之日有人於泖上遇之把晤如平時曹小志

朱章字焯漢由秀水遷居楓涇讀書過日成誦年十九以科試冠軍食餼設帳授徒造就甚衆畢秋帆尙書延課子姪器重之後以貢選諸暨訓導不赴

顧之葵字葭鄰號桐圃乾隆乙酉拔貢考取教習裘文達器其文行延課其子甲午舉順天鄉試教習期滿以知縣銓補當

楓涇小志

卷六

人物

四

塗七次爲秋闈分校得士最盛如崔錫華譚泰陳春華侯雲松各以經學詞章鳴於時之葵雖膺繁劇意存歸隱因顏其室曰晒柯軒黃左田宮保登第以門生禮見爲畫圖題其上曰謝家山色縣樓前庭有高柯不計年輸與先生日高詠簿書堆裏擘蠻牋惜其卒被吏議以終著有晒柯軒雲僑寒蛩等集嘉府志

顧之荃字賓鹿號吟松幼穎異倜儻自喜博涉經史爲文取心注手千言立就乾隆戊子舉人壯年不祿弟之芳字芬圃號蔚衡附監生學問湛深詩筆醲厚屢試不第與白下侯雲松

爲詩友著有閒耒草堂稿

善志參楓水詩存

費秉禮字東侯號墨莊讀書寒暑不輟文思敏捷下筆千言倚



馬可待工楷法善倚聲乾隆己亥順天舉人官福鼎知縣有循聲擢澎湖通判阮中丞深器之惜未竟其才以勞瘁卒於官子洙字子川恩貢生

曹小志

沈承煥字文濤號炳君年十四能文專心詩學尤好填詞工書

善樵晉唐諸碑間放筆為蘭竹殊古雅著有虛白集同族介

圭字震藩能詩善書工畫閉門謝客著有懷蓼齋集

參錄 徵香

居畫識

程鍾萬字建豐號芝田性孝友侍親不離左右父年九十患背疽奉湯藥夜不交睫籲天請代額為墳起疽既愈咸謂孝感所致事兄亦謹父逾期願始考終遺命祔葬新安祖塋時諸兄相繼去世惟三兄鍾基尚在年亦七十道途往返皆以身

楓涇小志

卷六

人物

五

先之並創祭田於徽以垂永久平居博觀經史課子廷泰舉

孝廉卒年六十八

新補志

許煌字星明號蘭樵椿子乾隆己亥以廕授武鄉令調安邑崇學校恤農除蠹北相鎮夫役車馬皆取給於民遇大徭役又斂錢助之煌除其弊更定章程民困一甦旋以母病告終養著有蘭樵書屋詩稿嗣子基河南縣丞以難蔭襲恩騎尉

志

胡德麟字載華號月江金山籍事母孝贍貧族嘗欲建宗祠置義田未果為憾易簀時猶諄囑其後人著有毛詩切音霏雪軒詩草子崧廩貢生官常熟訓導工書

節梁同書撰

謝昌鑒字軒鑄乾隆庚寅舉人幼承家學淹通經史百家詩文

宗漢魏六朝年十九舉於鄉壬辰禮闈報罷遭疾卒

原浙軒鑄



程維岳字申伯號愛廬乾隆庚子進士歷官禮部郎中充軍機章京丁未會試同考官陞山東道監察御史珥筆承明排纂典籍無不與丁艱歸主講東林書院著有淞笠齋詩鈔節善志

王啓焜字東白號秋汀嗜學能文屢試不第援例選四川大竹縣丞久之擢成都令由軍功累陞川東道廓爾喀軍興檄辦打箭鑪軍需有功 賞戴花翎兩署藩臬篆所在有政聲大吏如李康恪孫文靖倚之如左右手植川匪亂軍務倥傯靡間寢食以積勞卒於任所祀名宦祠著有萍廬詩草據經堂詩鈔焜積俸金建宗祠置義田五百畝以贍貧族至今數世賴之子堃建甯府經歷登墀有傳孫鍾鈞歷官打箭鑪同知軍功 賞戴藍翎善志參家傳

楓涇小志

卷六

人物

六

陳廷亮字學中好讀書爲文有奇氣嘗游閩遇陸朗甫中丞相得甚歡贈以詩有相逢玉友人皆鳳此日雞壇筆最銛之句廷亮耽吟詠凡游屐所至輒記以詩從孫郢字申芳讀書刻苦既習申韓術游幕維揚歸而搜輯家乘攷世次核事實纂修有法

陳秉元字仁溥號槎仙博學工文以廩貢肄業成均注選訓導屢試北闈未售益奮力讀書邃於掌故之學聲名藉甚惜不一遇知己而卒子鵬有傳

陳尙誼字晉範號笙客諸生屢試被黜遂援例官巡檢需次山西後棄官游幕工詩文深八法錢塘梁同書稱其結構精嚴神氣直逼先民著有三餘詩鈔



高稽字古與號稚峯善廩生平生不苟言笑時王杰爲學使拔置第一評其卷云文品醇正書法謹嚴望而知爲端慤之士後學使寶光龔試詩賦稽卷未完而名列高等著有鶴湖漁

長詩鈔

魏塘人  
物志

胡麒徵字綸錫號雪江居趙莊浜耽吟詠構精舍圖書而外別無長物暇則與田夫野老作真率語故其詩雅近儲王著有

臨溪草堂集

曹小  
志

郁昌齡字魯良疊遇覃恩登粟帛錫八品銜少孤稍長棄書習賈母病日夜侍脅不貼席力割股以進越日而母病遂愈昌齡鮮兄弟故視同堂昆季獨加厚平生好義舉濬市河禦火患構斃梁涉絮凍舖餒莫不倡率身任其勞既老體益豐

楓涇小志

卷六

人物

七

顏如童一夕忽衣冠起集家人而言曰汝等好爲人吾逝矣閉目不復言呼之微點首越一晝夜而卒壽九十四當嘉慶庚申上元昌齡九十雙壽子四孫十曾孫四繞膝稱慶錢塘

梁同書題其堂曰雙慶

嘉府志參魏  
塘人物志

沈步垣字在中號薇軒晚號退庵乾隆辛卯順天舉人授內閣中書辛丑成進士由庶吉士充武英殿纂修三通館協修改刑部主事陞員外郎擢浙江道監察御史查興平倉掌京畿道巡視南城署吏禮二科給事中性孝自入詞垣迎親入都服官十四年丁外艱歸服闋呈請終養工書尤長篆隸歷主大梁鍾山敬敷雲間書院歲己酉與從弟蓉城倡捐創建鎮東文昌閣年七十集耆舊重作九老會賦詩紀事卒年七



十四著有環碧山莊詩文集五卷

妻續志 參家乘

丁樽字仲匏號五石諸生善書工詩精篆刻閉門不與外事著有牛笛草

程廷濟字悅舟號肖墅廩貢生由方略館議敘授江西臨川縣丞擢浮梁知縣獲鄱陽盜置以法景德鎮有巨姓聚衆械鬪

單車往諭卽時解散復補直隸曲周令增隄防廣書院士民

沾惠擢雲南鄧川州知州引疾歸

嘉府志參魏塘人物志

張身浩字史傳號龍村由貢生歷任山陰永嘉訓導陞義烏教諭永嘉教官向理生監詞訟浩不受牒曰吾甘苜蓿不欲染脂膏也任義烏時值教匪滋事有株累者廉得其實力白上官保釋者衆著有松鱗書屋學吟草

善善

楓涇小志

卷六

人物

八

邵豐城字龍光號惕園善廩生工倚聲惜全稿散佚後吳江郭馨得其蘆簾閣殘稿前有王芑孫題字取渡泖秋草二闋入

靈芬館續詩話

魏塘人物志

謝恭銘字壽紳號若農乾隆丁未進士以庶吉士散館改知縣父壙追贈三品京堂恭銘赴闕謝恩特授內閣中書文淵閣檢校乞假旋里博收名人遺蹟刻望雲樓法帖相國曹振鏞作詩紀之

曹湯鼐字劍函復元子工詩文善書陸中丞曜目爲玉堂器著有咫聞暇錄詹詹錄續買愁集齊物類鈔紅樹山莊詩集

志

汪鳴珂字德臣恩貢生稟性英篤凡有急難相呼無不應嘗教子弟先飭廉隅後振文采門下多宗之著有蕘石山房集

小曹



志

程廷泰字西泉乾隆甲寅舉人官江西布庫大使援例為刑部郎中有老婦被焚斃往驗同僚將嚴鞫其子廷泰周視形迹

知非薄待其母者力持之子得免後引疾歸

嘉府志參魏塘人物志

張身濤字翔鷺號西樵監生好讀書博通經籍工隸書乾隆庚

子南巡繕冊以獻得邀 睿賞嘉慶五年嘉善邑侯萬相

賓聘修邑乘盡心纂輯條縷詳明著有娛志居詩鈔

嘉府志並善志

陳秉悌字葆恭號雲留少工舉業屢試不售後援例官山東鼇山司巡檢懲治奸胥不少貸督開引河地多古塚為掩之鼇人感德焉年七十餘卒於官著有貫經堂詩存鼇山樵唱

陳秉浩字映波監生援例分發陝西候補巡檢復入費官布政

楓涇小志

卷六

人物

九

司經歷性甘淡泊早引退樂於為善捨糶施襖行之無倦因集格言勸善諸文合而刊之以風末俗

陶鎔字載王號東圃善邑明經爾穉孫好圖書鼎彝工書畫著

有味間堂吟稿

曹小志

陳暲字觀光號二瓶孝泳子候選布政司理問知州銜善事母族中物故者多浮厝暲於公田中擇地叢葬厝皆得安復置

田五頃助立義莊以贍貧族承先志也子家珍字小舟監生

嘗以義田贏餘設立家塾族中寒素子弟多所造就

嘉府志參前志

施尙桓字寓溪監生熟讀諸史工詩好摹古隸善鑒古同時謝恭銘所得書畫必畀尙桓評定真贗程僖張身濤皆與之討

論嘗賦七夕詞一時傳誦著有甘白齋詩集



陳應徵字有珍善庠生規行矩步規戒子弟族人皆嚴憚之子方駿字康侯嘉慶辛酉舉人嗜學能文不營外務考取咸安宮教習禮闈不第益發憤以勞疾卒

曹相虎字景穆號藐庵金山籍諸生研究字學凡脣齒鼻舌之音陰陽反切辨晰毫釐精醫治病輒效著有情蛻一卷曹小志

王煥字中照官四川萬縣縣丞嘉慶初教匪滋事大吏調赴軍營擘畫悉中以軍功擢琪縣令未赴任以積勞卒於軍事聞

賜祭葬贈國子監學錄子堦字陞升官四川百丈司巡檢隨營効力擢雲陽令丁艱服闋遷貴州普安直隸廳同知卒

於任嘉慶志參魏塘人物志

陳應孫字明彝新安籍爲人愿慈敦孝友首捐五十金倡修郡

楓涇小志

卷六

人物

學郡守吏旌其門

陳邴字如京號紅圃庠生由臚錄議敘授邵陽縣丞擢臨潼令值教匪不靖邴奉檄剿賊擒首逆李貴誠以軍功歷陞甘肅布政使護理陝甘總督賞戴花翎十餘年間不次超遷置身通顯一時無二未幾以積勞成疾卒著有從戎草南園雜詠新豐商於諸稿生平敦本睦族叔祖孝泳創義莊邴實與有力焉嘉慶志並善志

張修槎字玉何監生克承先志誼篤本宗創建支祠並置田二頃以供歲時祭祀贍養貧族祠旁葺小園頗饒泉石花木之勝

陳鵬字翼雲號鹿萃由臚錄議敘授廣明州吏目以軍功陞普



安州州判署定番州事時逆苗未靖奉檄剿捕殲渠魁餘黨解散奏報不實僅得隨帶加一級其任普安時有楊黨中者謀不軌鵬集兵役擒擊比結案餘官皆升擢而奏案獨無鵬名後歷陞連平州知州旋罷吏議鐫級遂游幕以終著有萬

里蛩吟一卷

嘉府志參劄  
塘人物志

沈蓉城字書林號秋航婁諸生少即能文並善詩賦人咸以神童目之屢力秋闈不得志夙承家學治目疾輒效嘗與從兄步垣纂修家乘其力頗多又倡捐募建文昌閣晚構一室曰絲壺小隱以詩自娛道光壬午以壽賜九品職卒年八十三著有秋航詩鈔楓涇竹枝詞

沈玉堂字西茗號夢香附貢生工詩古文詞著有舊雨齋集從

楓涇小志

卷六

人物

十一

弟金臺字紫環善屬文精繪事山水法王麓臺玉塔字仲與廩生十二能文工詩貢成均肄業期滿以訓導銓選著有淡虛齋詩稿

程廷璵字理孚好善尙義睦姻任卹倡建宗祠置義田一千餘畝以贍貧族 朝廷旌之議敘知州銜

程廷獻字書城號擁巖監生家資鉅富廣設質庫庫例凡銀出入價有低昂廷獻除其弊衆商從之貧民沾惠焉

王輝字慎修號環溪善屬文屢試未雋援例官湖南雙江司巡檢有惠政居鄉常周人急不惜典質以應性瀟灑不事生產著有環溪詩集子修地候選縣丞修埽漳浦縣丞修塏蘄水縣丞修埭江蘇候補道庫大使



程大卓字伯高周族人貧乏無倦休甯徐某僑居其舍徐遠出無耗貧不能舉火母計鬻媳能兩活有人持金來已定議矣媳痛哭不忍去大卓聞之以己金不足復貸於所親償其值而事寢他日徐歸願爲傭以報力郤之

善志參魏塘人物志

許漢爻字晉康號梅亭王猷元孫歲貢生學問淵博工舉業善詩古文嘉慶辛酉應嘉善縣令萬相賓聘修邑志纂修有法著有梅亭詩鈔

曹小志

王登墀字形軒議敘州同嘉慶十九年隨成都將軍賽冲阿剿股匪有功賞戴藍翎歷陞順慶府知府丁艱服闋補南康府知府南康凡府縣試童生例饋贄儀墀革之寒士感德整頓鹽務力裁漏規未幾卒於官

楓涇小志

卷六

人物

十一

吳遇坤字禹人爲諸生時即有盛名乾隆乙酉選拔入都試列優等未及廷試聞母喪馳歸服闋疊試未第益肆力古文造詣淵邃姚姬傳先生以今時歸熙甫目之嘉慶戊午與從弟書城同舉順天鄉試乙丑會魁選庶吉士散館改廣西貴縣知縣愛民禮士事上官頗強項甫一載罪謫職繼以他故遣戍塞外遇赦歸貧無立錫依其從弟居焉時年逾六十患風痺手顫不能作字猶撰天咫錄口授姪輩書之所作古文爲隅齋自訂稿五經各有辨正惜皆散佚當春官未第時嘉善知縣萬相賓聘修邑志多所考訂時人翕服

嘉府志並善志

陳鴻墀初名治鴻字範川嘉慶乙丑進士選庶吉士充會典館

纂修十年聖駕謁陵回蹕恭進詩冊邀睿賞旋以



畢誤歸道光初起用內閣中書戊子充順天鄉試同考官歸  
田後掌教廣東越華書院著全唐文紀事一百二十卷抱簫  
山道人詩稿子宗親刊而傳之全唐文年表四卷賜硯齋詩  
文集十二卷待刊

嘉善府志

吳書城字擁萬號臥樓燦子嘉慶戊午順天舉人由內閣中書  
充軍機章京累遷至戶部郎中尋出爲貴州遵義府知府甫  
下車即擒訟棍蘇長壽配之民大快旋擢貴東道馳赴古州  
查生苗紅苗互鬪命案時檄書旁午前後案稿不下二十萬  
言皆親自裁敍兩月而案成兩署臬篆居官清廉勤慎著有  
詩文兩卷撫苗事略一卷

節家傳府志略異

黃大佐字贊侯號澹園少喪母嘔血不欲生事父能色養事兄

楓涇小志

卷六

人物

十三

尤恭弟姪未婚則爲之娶婦以博親歡壯游四方所至交其  
賢豪見善輒行在滇南有新安金子鱗者挾鉅資爲商疾革  
執大佐手泣曰吾不起矣兒在家阻萬里君古君子以身後  
累君大佐簿其遺資封緘以待子至昇之資品無闕其子感  
泣陳其寶玩請擇所愛以爲酬笑而不顧

善志

沈起鳳字儀庭監生敦本陸族卜地擬建宗祠有志未逮以子  
仲杰仕贈如其官子壘字香渚婁庠廩生事親以孝聞篤友  
于性慷慨有緩急求助者靡弗應與弟仲杰捐資規畫建立  
宗祠以成先志仲杰有傳壘子遂初字菴原廩貢生官安徽  
六安州訓導有文譽

張定楷字晴川號予田華亭諸生居鎮北楊俊浜少穎敏讀書



過目成誦南闈屢躋北闈又蹶名心遂淡性好客坐上常滿  
尤樂排難解紛工書法年八十能作細楷

張朝勳字竹垂號純齋金山諸生居楊俊浜好宋元明先儒之  
學靡不悉心考訂期於愜心而後已每展卷遇忠孝節廉事  
輒肅然起敬爲文原本經史書法亦適勁

郁松垣字楷峯號曉山昌齡次子幼聰慧好學弱冠游庠旋食  
餼益肆力於舉業名噪一時乾隆丙午秋試文已擬中數日  
卒以額溢見遺士林惜之前後踏省闈十六次屢薦不售處  
之坦如詩文詞賦爲寶東皋學使所賞平居孝于親友于昆  
弟同邑閣學錢樾爲撰傳

參家傳

陳縉書字玉墀附貢生宅心忠厚族中有艱難事任之不避經

楓涇小志

卷六

人物

十四

理義莊無一毫苟且有誣之者飲恨以歿子垣有傳塲廩貢  
生有文名工書法

曹相駿字雪莊金山庠生博學多聞研窮經史閉門著述攷古  
證今輯有楓溪詩存楓溪小志

陳念祖字德修號克齋監生佐從弟家珍於宗祠設立義塾子  
弟多所成就事母色養兼至易簣時猶諄囑其子曰善事祖  
母平生好義樂施子宗溥有傳

戴公望字又黃號貞石官江蘇布政司理問能詩善寫生工六  
法非佳紙不輕渲染梁章鉅開藩三吳時喜收名人書畫凡  
獲名蹟必畀公望品評嘗得惲壽平小像以神似公望因持  
贈之公望刻寶懌帖以弁其首錢塘陳文述畫林新詠公望



亦有詩一絕也著有近游草夜航歸棹集

嘉府志參劉塘人物志

王文照字顯謨號玉圃好施與求無弗應已或不足委曲籌濟之有貧不能葬親者給地以葬之累年賠賦不憾子錫祺有傳

顧鏐字晉南諸生敦本睦族嘗置田以葬族之無地者俾無暴骨不形一毫德色

鍾奕欽字少絲婁邑歲貢生有文名入棘闈十六次屢薦未售

從游者日盛多所造就壽八十子星源字銀洲號望槎恩貢

生亦有文名

曹小志

唐汾字松舟善書尤工篆隸并善鐫刻有古趣性豪邁喜吟詠嘗為某中丞客方伯某來謁中丞觴之汾遽出不為禮既就

楓涇小志

卷六

人物

十五

坐據案而啖酒未半已翩然逝矣方伯愕然中丞曰此唐汾也日久聞唐布衣名乃不意其若是耶既而歸窮困如故與故舊寄情詩酒有疎狂半世無錢癖落拓一生有酒緣句

曹小

志采入嘉府志

金霞標字赤城幼即工吟詠詩筆不尚纖濃有以平淡少之者

因口占一絕云詩貴清真便作家那爭冠冕與繁華要知越

女堪憐處不在吳宮在浣紗

楓水詩存

蔡長庚字坐花維熊曾孫官湖北鄖陽府通判志節廉介不善媚上官年餘即賦歸與詩筆雋雅與海昌潘天掄吳江翁廣平交最深著有恕存草

黃人雲字友龍號若屏監生端慤自守著有遜是遺經四卷子



春暉字果祥婁庠生兩試京兆以薦卷挑取四庫館謄錄議敘授雲南布政司經歷有政聲工吟詠著有擲牡集

沈錫章字士恭號白村母病刲股和藥以進病旋愈入監肄業疊試北闈不售善隸書工畫山水能詩著有雲間集子璇有傳

吳廣成字丹泉號西齋青浦諸生縣府院三試皆冠軍有文名通史學輯有西夏書事明史紀事本末補明末紀事並精岐黃術

陳大溶字春舫號晚蘭以宛平籍補博士弟子員由實錄館校錄授四川彭縣典史兩次入資歷陞浙江台州府知府署督糧道台州民風刁詐嚴治之始斂又捐俸給貧嬰育全活甚

楓涇小志

卷六

人物

十六

衆未幾引疾假歸僑寓錢塘歲寄數百金爲同善會瘞埋費當任彭縣典史時多瘞暴骨斃石壘之旣去猶歲遣人瘞埋一次卒年七十九著有枕善堂詩集書法亦工子家樂官江華縣知縣孫煥聲官武康縣知縣

顧遜字敬齋晚號了了先生嘉郡庠生善書工詩後失明猶應萃川王恭壽聘課其子講解經籍瞭如指掌著有了了先生詩鈔姪增瑞號鐵芝諸生性兀冪能詩善書同治紀元避兵滬濱遇日本人慕名求書遂疾書以應其人喜甚酬以番紙訂海外交著有煮雪居詩稿

謝江字岷山號樹庭墟孫廩貢生工詩精舉業應南北闈十六次卒不一第 仁宗東巡嘗獻詩賦邀 睿賞弟沂字抑庵



拔貢生傲骨稜稜絕不肯作諂媚語文亦肖其為人

沈仲杰字少梁號荻江廩貢生年十三游庠食餼後援例官寶山縣訓導以父建祠未果與兄壘首倡集資卒起祠宇並偕族人捐置義田六百餘畝以充祠祀贍族之費道光九年重游泮水卒年八十有三

鍾式玉字璞存號瑤圃由海甯徙居楓涇敦孝友工畫豪於飲譚傾四座有句云琢句每嫌詩未穩飛觴不厭酒頻傾可見其概子德基字承福號嵩霞好善樂施往往獨力任事曾孫灤字養泉殉難有傳清字蓮漪寶濟字若川俱諸生能文志程僖字再庭號白村婁邑監生幼好讀書喜屬文及壯習岐黃爲嘉定沈鳳輝入室弟子善奕工書尤長於漢隸張遷婁壽

楓涇小志

卷六

人物

十七

諸碑摹之酷肖與唐松舟布衣齊名性嗜古精鑒別間涉吟詠亦瀟灑絕俗嘗輓宋某聯云疎影橫枝到眼恍然如讀賦登山臨水傷心豈獨爲悲秋爲人傳誦子嘉樹字卿譽號春山監生亦工奕善鑒古凡書畫鼎彝之屬家藏不少善志乘參

吳豫字得之號菊人遇坤姪附監生善書工詩與黃蕃顧超邕輩結詩社有紅字百疊韻刻燭而成極一時文讌之盛楓水詩存

王錫祺字慶餘號佐卿居陸莊嘉慶癸酉舉人官新昌縣教諭丁父憂歸主講魏塘書院絕意仕進耕種自給謹身飭行鄉里推重嘗撰堂聯云與鄰里儉勤成俗教子孫耕讀傳家可想見其節概卒年七十有九著有羣書類鈔八册子洪鈞字壽山殉難有傳



程文杞字楚卿號又韋廷獻子嘉慶己卯舉人生而穎異九歲能文畢十三經文選十五游庠十九登賢書一上春官以痿疾折回遂臥牀不起猶與同里顧桐以詩唱和道光己酉水災倡捐以賑饑又捐資佐登瀛會從嫂陸氏家貧守節無後以子熙純嗣率家人敬事之平生好菽蘭著有蘭蕙論略石門倪耘爲繪蘭譜並有菽蘭書屋詩草長子熙雍字陶甫議敘部寺司務善臨池樂行善事次子希曾字蓮叔候選部寺司務性豪爽好飲工書

嘉府志  
參家乘

沈璇字春如號子雨天姿明敏學問淵深食餼後即於道光辛巳膺鄉薦屢上春官不售援例以鹽大使需次浙江旋丁母艱服闋後奉委嶼城查辦鹽務以疾告歸

楓涇小志

卷六

人物

十八

顧超邕字悔庵之葵子監生幼敏慧以古學見知於汪憲庵學使屢試未雋著有紫菘館詩稿弟景康字默庵邑增生工書好吟詠著有話雨軒詩鈔康子柝字小酉諸生工詩善弈許進字崧南婁庠生博學能詩吳廣成輯西夏書事進參訂之著有崧南詩草增訂改元考同二卷歷朝僭國世系摘覽四卷

王慶濤字壘伯增貢生河南候補縣丞性孝以母疾憂成心悸既愈復聽鼓汴梁爲中丞楊國楨器重著有深翠軒吟稿屠存基字秀嶺居張涇匯性誠懇勇於行義道光甲申邑宰憚公敷開古華亭塘修普濟橋以存基督工實力奉行事竣以績懋河渠額表其閭次年又勸募巨貲修張涇匯街

善志



李文明四北區南落浜人監生慷慨好施求無弗應如建橋梁  
修寺院往往倡率家雖中落卒不悔

沈漢揚字煥暘由城中遷居楓涇之廣濟里童年遭父喪哀毀  
如成人遂得咯血疾終身不瘥故不娶事母孝兄弟二人皆  
館於外漢揚獨任侍奉道光元年母疾漢揚禱天願代夜夢  
神語曰鑿汝誠已許所請惟不利於汝耳越數日果卒而母  
病尋愈生平喜吟詠著有驢背吟草

費震文字東雷號守餅監生援例分發河南候補縣丞權祥符  
令借署嵩縣巡檢泌陽典史勤奮自矢潔己愛民家素豐裕  
不屑持籌握算而性又慷慨交游甚廣有以緩急告者雖兼  
金數百勿吝也家以是中落生平好賦詩晚歲尤工著有傳

楓涇小志

卷六

人物

七五

經堂詩鈔嵩縣竹枝詞

謝漢字皋佩號廣甫恭銘子工詩文道光乙酉舉人官上虞縣  
教諭著有宗經集文稿弟洙字菊人廩生好爲詩得晚唐風  
調采入靈芬館詩話

顧性蘭字仲實號壽香之葵孫善詩年弱冠訪父執侯雲松於  
安徽歙學署侯以詩示之一夕和成七律三十首侯驚異之  
兼長繪事著有餅齋課餘一卷

姚燦字礪溪青浦籍監生居婁縣一保之范浜好施予族有喪  
葬弗舉者輒仗助之青邑童試卷結費向由諸童自備燦擬  
捐未果會疾革命子朝陞等以田百畝捐作卷結費士林德  
之他如松郡全節堂青浦孔宅庭聞書院珠溪書院先後捐



田亦百畝子朝奎字若愚附貢生候選訓導勤學不倦博覽經史年八十猶好爲文作小楷善推舉法治小兒病輒效不取酬有求之者雖年老常徒步往治不憚煩勞

程嘉猷字簡庭廩貢生居鎮南好學工文名場屢困入成均肄業考取教習嘗手輯支譜支派詳明

許德潢字甘泉性孝友兄被訟累竭力營脫親歿喪葬獨任慷慨好義道光癸未水災倡捐助賑大吏給額以獎之幼喜讀書以多病棄舉業流覽羣籍精究醫理嘗注醫學心悟甚詳間爲人治病輒效年八十猶耳聰目明手不釋卷子辰珠有傳

黃蕃字飛青號匏庵恩貢生善書樵晉唐碑帖惟肖工詩文屢

楓涇小志

卷六

人物

二十一

赴鄉闈數薦不售精於鑒古嘗手抄書籍不下數十册著有味經堂詩集

程應枚字文木號又泉廷泰子諸生道光癸未水災厝棺漂溺捐資撈取瘞之工詩能鑒別古彝尊子光熊字蓮壽恩貢生有文名歲科試未嘗列次等官富陽縣訓導工詩善隸篆書著有滌硯齋詩稿篆隸指掌

參嘉府志

黃應翔字秋字婁諸生讀書攻苦手不釋卷道光丁酉鄉試獲薦不售其遺稿友人許辰珠刊以行世

程文榮字魚石號蘭川官江蘇江甯府北捕通判清慎自矢咸豐三年粵匪逼金陵郝方伯宿藻委辦城守見能實心任事益重之事不待稟白而行且聽遴員以資臂助既而賊更梟



張攻城甚急遣家屬歸曰吾當與城爲存亡後城陷遇害事聞賜祭葬贈道銜入祀昭忠祠給雲騎尉世職並予恩騎尉世襲罔替文榮工書法嗜金石與同郡張解元廷濟討論靡倦所藏紀伯鐘爲金品之最並獲孫星衍跋以拓本示道州何紹基爲作記以小楷書之藏碑帖書籍甚富尤熟於目錄之學能縷指漢唐以來及近世撰人卷數至秦漢後碑目更可悉數焉著有嘉興府金石志若干卷江甯金石志補四卷鐘鼎校誤一卷南村帖考四卷輯隸續補一卷嘉府志並善志蔡潤琛字佛華官湖北廣濟令洩任數載撫字得宜咸豐癸丑春粵逆犯境率兵堵禦經旬始退正擬查辦撫卹因莠民抗糧滋事鐫職甲寅元夜隨吳制軍文鎔次黃州登城捍禦賊

楓涇小志

卷六

人物

一二十一

勢披猖兵單力弱同時被害事聞加贈知府銜并祀昭忠祠賜襲雲騎尉加給恩騎尉罔替弟祖存字硯畚兩淮候補鹽知事充海州總巡殉捻匪之難姪振基字根香候選從九品亦隨營殉難嘉志參志

謝字澄字石雲墉孫工書山水得王椒畦指授風骨直逼先民由廩貢援例官直隸甯晉令有治河政績解組歸以詩畫自娛著有傳雅堂詩集子調梅藝術有傳公桓字次圭同治丁卯亞魁官上虞縣教諭以善教稱畫承家學嘉府志參善志

吳復字鑑泉善邑廩監生性警敏年十三游庠弱冠食餼博通經史精制藝踏省闈十餘次卒不一售後名心遂淡爲人謙厚謹飭善引掖後進故及門稱盛造就良多晚好徒步自適



其子汝侗常隨之行年七十七卒汝侗殉難有傳

郁道銘字澹園諸生議敘縣丞持躬端潔經理同善會二十餘年經費裕如廢者咸舉家法嚴肅嘗延名師以訓子姪子岷江字湘巖道光庚子舉人官江蘇候補直隸州州同力學工文

葉奕良字萬青號曉山監生青浦籍祖承柏以孝行旌父宜菖遷居楓涇奕良敘倫尚義好古嗜學幼喪母哀毀如成人嘗侍父舟行遇風舟欲力援出險事繼母克盡子職中年以病就醫京口留數月遂通醫理道光己酉水災襄理賑務不辭勞瘁輯有醫方薈編光緒九年旌表孝子弟亦紳字山泉監生議敘從九品存心忠厚克盡孝道卒年七十四良子

楓涇小志

卷六

人物

二十二

世瑜字稼夫稟性慷慨里有忿爭輒爲排解卒年七十八

府松

續志卷六  
家乘

許錫蕃字一峰道光己亥舉人候選主事治家整肅敦禮讓遇事敢爲己酉水災饑民滋事凡被控者當道悉置之法錫蕃家亦被擾獨不上聞旋議賑卹始終勤慎咸豐癸丑賊陷金陵土匪蠢動蕃約里人爲守望戶出一丁得一千八百餘人遇助餉勸捐諸大務有司輒諮以行生平嗜詩酒好客繪袖詩襟酒圖以寄意臨終命其子曰吾死喪葬循禮毋焚衣服物力維艱暴殄不祥子承澤字寬甫有幹才克承其志爲基長孫承襲恩騎尉

施鑿字周樽號曉峯監生好讀書弱冠後幕游汴梁熟於治河



掌故援例爲河工候補巡檢屢辦河工隄防疏濬事宜上游器重著有治河略述一書圖繪器用甚詳

顧桐字秋士諸生之英孫工詩善書制義有先正風鄉闈屢困吳學使鍾駿甚嘆賞之性落拓筆瓢屢空晏如也惜其頭項生瘰終身不愈志更屈焉子熊字躍飛諸生殉難有傳

顧念封字臣哉程長齡字春芊陳世潢字尙賓陳鴻遠字輪香陳奎照字杏仙陳奎章字春垞俱嘉善諸生顧珍字麟昭監生或工詩文或善八法皆先後有聲於時惜未一伸其志

沈金奏字梅生縣府院三試皆冠軍黃天錦字織雲趙家珍字芹泉鍾廷楷字式堂黃應恭字鞠農王越字威如俱婁諸生砥行讀書舌耕自給遂舉業困名場士林惜之

楓涇小志

卷六

人物

二十二

費均字治平震文子初官山東安邱縣典史援例游陞河南候補通判值粵匪攻汴梁以守城捍禦功保陞知州旋授睢州知州撫字宣猷頗著勤慎又值捻逆犯境督率練勇迎拒擊

郤之嗣以勞瘁卒於官

前志采入善志

張杓字左江性至孝母病久侍湯藥未嘗偶離讀書仍晝夜不輟惜不永年

顧煥字孝若善廩生讀書自勵制義詩賦俱工歲科試屢列前茅聲蜚郡邑粵匪犯境被擄不屈死同治五年旌入昭忠

祠給予雲騎尉世職著有壽花室詩稿輯楓水詩存

嘉府志並善志

沈珩字貞吉號璞齋幼穎悟好讀書父以家貧俾學賈而傲骨性成以市井卑污不屑爲復讀書工八法善駢體游幕淮徐



間爲人司筆札與屈俞賡少尹婁慶堂明府主賓相契垂三十餘年晚歲歸假館授徒終日端坐課讀甚勤琿行誼嚴正狷介不污爲里黨敬憚咸豐辛酉以從九品殉粵匪之難年七十三事聞 卹贈鹽知事銜著有游滌雜記子楷剛直有父風遇賊亦被害

俞成鈞字問樵性慷慨能明大義以鹽大使需次兩淮憫族中之貧不能葬者積十七槨獨力任之購地有四北區合葬焉

鄉里咸稱厚德

善志

程乙林字覺莊號後村議敘縣丞賦性清高不喜繁劇幼年身弱多病遂棄儒習醫好靜默言笑不苟人有求醫不索酬素工弈嘗與陽湖楊振藩同邑顧紳交暇輒一枰相對並善山

楓涇小志

卷六

人物

二十四

水喜慕文待詔中年家雖中落佃有抗租仍不追索也故咸稱長者卒年五十

張文淮字桐齋居鎮北監生性狷介好客築蕉綠館集名人繪圖題詠觴客於其間文淮讀書不求甚解頗得逸士風粵匪犯境僅以身免避兵練塘貧病相連卒以困厄死

謝仁溥字湘屏號芝齡善庠生官河南試用縣丞隨大帥袁端敏公剿捻逆有功歷保同知直隸州同治紀元署宜陽縣知縣捻逆撲犯宜陽大股虜集仁溥率勇堵禦力弱城破巷戰遇害事聞 卹贈太僕寺卿銜給雲騎尉世職入昭忠祠事

蹟宣付

國史館

嘉善府志

許辰珠字綺庭弱冠有文名既入泮科試冠軍食餼道光丁酉



舉鄉薦主司得卷賞其經策歎爲績學之士壬辰大挑銓選  
長洲縣教諭丁內艱服闋援例以知縣候選尋因父年老築  
秀綠山莊以居之不復作出山計時方多故當事輒造廬諮  
訪商辦時事旋粵寇逼境避兵狼山之陽癸亥劉統軍秉璋  
克復楓涇延辦善後事宜事竣保加運同銜後如清田賦濬  
市河創義塾不辭勞怨平生好學不倦專心經史融會貫通  
故爲文有根柢善詩賦袁太史嵩齡郁孝廉岷江程廣文光  
熊皆出其門著有吟薰閣詩集寄生吟草評月草堂賦稿行  
世子容照字朗眉力學工文病弱早世

行述參松江府續志

沈王佐字松仙婁諸生好學飭行工詩文善篆隸鐘鼎文旁通  
岐黃術七試秋闈三薦未售鎮東文昌宮遭亂已廢有田數  
十畝王佐經積租資重建三楹集同人每年誕日致祭以復  
舊觀並修晏公祠著有避兵草

吳承業字蘭堂國學生婁縣籍河南候補縣丞署陳留縣知縣  
中歲告養歸多材能工書善篆刻知醫治病多奇效性慷慨  
不喜持籌握算故家漸中落晚年含飴弄孫怡然自樂也卒  
年六十七

新纂

沈汝梅字兆揆號敦齋璇子弱冠游婁庠援例貢成均工書法  
摹顏柳諸家靡不酷肖同治初投筆從戎爲統軍吳觀察記  
室嗣以克復常州等處保舉以訓導銓選旋病卒

新纂

沈汝楫字涇舟號勉齋年未弱冠與兄汝梅同入膠庠屢試秋  
闈不售遂設帳授徒策勵精勤門下日益盛游庠序登賢書



者相繼後纂游浙江之桐廬縣適粵匪犯境從大令拒賊力

竭嘔血死

參婁續志新補

郁以瀚字廣期號子靜善邑附貢生好學能文特躬謙謹同治初粵逆蕩平當道檄董善後局事有曾授偽職者行賦以冀免瀚悉卻之經理義倉必躬必親無一毫苟且他如濬河瘞埋創書院皆擘畫裕如克臻周妥一鄉稱善士焉

陳汝濤字爾松鵬孫監生中書科中書幼讀書能知大義祖歿父死粵幕遂棄儒冠殫心經世之學義有不安必參究羣籍貫通無滯而後已由是歷粵閩數十年佐勘積案識見超卓大吏爭延入幕如李福泰郭嵩燾王凱泰江國藩諸鉅公相倚如左右手嘗謂華洋雜處民教不和大都因嬰堂醫院詭

楓涇小志

卷六

人物

一二十六

秘情形以疑啓覺使收嬰必報病者留治必報病故必驗有司具檔稽察之則迷拐剖挖之謠絕民教可由閔而通也其他論時事尤詳著述皆有關學術掌故蠅頭稿本盈尺衰輯成編可與切問齋文鈔頡頏行世生平好藏書籍嘗曰以金遺子轉溺於溫飽不如貧也性孝友二世旅櫬卜葬於西湖之濱承先志也當其父病時適伯父鴻墀亦疾奔走侍湯藥數月不怠外甥陸芝祥及從弟姪先後成立登仕版皆汝濤教育之力晚應兩淮方都轉聘自粵之廣陵未幾歸里光緒庚辰秋患微疾夢數人舁輿請行旋卒年六十九著有辦貞

亮室隨筆

前志采入善志

陳宗溥字西來號竹士善邑歲貢生注選訓導敦本力學從游



甚衆家祠有義莊兵燹後幾廢墜宗溥力舉之得復舊制同治七年規創書院邀同志廣爲勸募藉立始基辦理蠶理出館穀餘資以佐經費十餘年不倦也嘗獲曹相駿風涇小志稿以略而不備積廿年之久增輯大半光緒初婁邑程侯其氏嘉郡許太守瑤光聘修府縣志以其爛於掌故也門下通經義能文者不少篋中舊筆無不珍如球璧云

前志采入涇志

陳垣字丹叔號星庵幼警悟工書弱冠以第一人入泮道光己酉登賢書援例爲內閣中書咸豐庚申粵寇至奉辦團防同治癸亥隨李統領鶴章攻克陸家港賊壘籌辦軍需等事閩閩安謐旋劉統軍秉璋克復楓涇延辦善後心存惻隱保全鄉里不少當道敘其勞保加四品銜他如清田賦創書院辦修家祠整義莊規制永久族人賴焉

楓涇小志

卷六

人物

二十七

賑濟河悉心經畫嘗排難解紛里黨雀角事因之悉化晚歲沈鏗字琴樂事親孝道光己亥母張病篤鏗夜分禱天割股煎湯以進母飲之越數日而愈人皆未之知也及夏日解衣父見癩痕詰之始悉平居待人以誠貧富無異視尤能濟人之困年三十卒彌留時猶囑其妻盛曰善養吾老父吾死瞑目矣

善志

謝雍泰字松齡嘉郡廩生幼工詩好讀書熟精三禮至老不忘道光季年光祿卿青麐督學江蘇聘爲襄校咸豐庚申遭亂遷徙猶吟詠不輟卒年六十餘著有蠶吐殘絲詩稿子嘉樹字卿梅優貢生性聰穎博學工文尤長詩賦試輒冠其曹惜



中年遽歿

善志

程植字厚齋從九品性至孝道光十四年母患病淹纏牀褥勢將不起植日侍湯藥不離左右迨病篤焚香默禱於天願減已算以益母壽並割臂肉以療病果瘳至二十六年而歿適增一紀之數

善志

陳宗儀字平齋幼失學習賈海鹽成豐庚申肆主以五百金屬往平湖購貨至則寇已溷入未幾亂作倉皇返棹舟子謂君攜重金盍以被劫報儀厲聲斥之卒以原金還肆主族有義莊田千畝司事避難江北儀暫權管時佃逃殆盡招集撫綏經理三年田無荒廢後司事者旋里即交還之家雖貧好周人急遇有求不惜轉貸以應故人咸稱為長者以子銓衡

楓涇小志

卷六

人物

二十八

貴贈奉政大夫

參陳銓  
新呈稿

李珍字儒懷號椿農道光時自嘉善北門外椿樹村遷居楓涇生平敬祖孝親待人忠信交游有過不憚面責改則如初人故樂其介而忘其嚴性慷慨里黨有急者恆濟之無吝色兵燹後族中有五世未葬之槨代安窀穸年逾七十矍鑠如少年人以爲樂善之報云子鏜有傳鈺字瑤圃國學生樂行善

事

新纂

沈晉康字子卿監生性孝友以父母歿於亂離時棺槨殮葬未厚遂終身布服遇忌日必涕泣三官堂毀於寇就其址建亭以慰行人憫貧者之死無棺創代賒會以給之自光緒丁丑各省災稜竭力勸募並捐已資全活甚衆里有良家子嘗負



富室貨資以嚴迫驚怖死貧無以殮妻子將以身殉康陰使人畀以金得不死後其子成立登門謝家人始知之他如修橋放生施衣送藥掩骼育嬰諸善舉皆樂爲之重建黃良甫橋病革時猶以橋未竣工囑子勉成之卒年七十

善志

謝琪樹字修眉監生恭銘孫慕游江左保舉巡檢試用吳門性瀟灑不染俗塵工寫生善吟詠有黃蝶詩四律最傳誦人稱

謝黃蝶著有六真齋詩稿

善志家乘

程炳字思齋嘉郡增生少工文從汪學師能肅游力追天崇

國初諸家不喜時下習氣平生兼精醫理治病輒效故遠近爭聘之秀水令郭恩觀母病篤延炳往治投劑而愈以醫師之良額贈之婁邑金荇人明府創建義倉於郡廟旁炳與郁

楓涇小志

卷六

人物

一一九

以瀚陳垣程希曾沈森等首先經理至今賴以日擴

參善志

蔡鳳池字奉時號閻齋善邑廩生性孤介淡於進取少時從青浦何其超學岐黃非其好也同治間由楓涇遷居城中生平最工制藝試輒高等與弟子繩削文字不肯一字苟且尤精數學自知逝期卒如其言

善志

程同榕字梅谷監生性亢爽有幹才地方潯河等事力任不辭尤善爲人排難解紛並精醫人有求治者不索其酬卒年六

十餘

以下新纂

施遂字焦桐號仙洲恩貢生就職直隸州州判工詩文精篆刻並善六法摹甌香館粉本頗能神似中年居遭回祿身外無長物嗣遇寇擾流離坎坷挈家走滬上設古肆以餬口事平



旋里重理舊業課徒自食繼妻朱爲女師於後堂從游並衆  
故境亦漸裕性謹飭讀書外無他好卒年七十三著有繞梅  
吟屋詩稿拳石草堂集味琴館詞待梓子祈字亦秋諸生工  
書有時譽惜年逾五十遽卒

程德培字樹人光緒姪歲貢生候選訓導精書法工文章秋闈  
兩薦未售性豪爽不治家人生產有資輒罄生已失怙事母  
克孝尤愛交游晚年好飲論事必獨抒己見不喜拾人牙慧  
年六十三無疾而卒

郁宗蕃字价人號耘夫光緒乙亥舉人稟性亢直讀書明大義  
兩試春闈薦而未售由揀選知縣援例晉周知銜郁氏遷楓  
後譜牒散佚從叔以瀚纂修未竟蕃繼編輯閱數寒暑始克

楓涇小志

卷六

人物

三十

成帙鎮向無課士所因偕陳廣文宗溥等集資創立楓溪書  
院延山長給膏火並首倡捐資成小登瀛會多士賴之他若  
接嬰濬河積穀等事靡不實力贊成蓋孳孳爲善其素志也  
黃良甫橋久圯急流渡險謀於沈上舍晉康各捐巨資重建  
工藉以竣卒年六十四著有靜怡軒吟草弟德標字芷汀歲  
貢生就職訓導督理瘞埋亦克盡力

蔡家齊字叔平善邑附貢生以從九品需次江蘇工書法摹顏  
魯公米南宮乞書者無不應委署婁縣典史時已衰老性本  
亢爽然居官頗謹遇事必商諸同僚未嘗擅行故上游器重  
之卒於任年七十八

蔡錫增字荻波善邑附貢生以助賑獎國子監典簿好學飭行



工楷法遭粵匪亂資產蕩然流離顛沛中舉其先世秋澄封翁九老圖題詠暨蘭圃殿撰手錄著述載與身俱卒能保存人尤難之性亢直有幹才善爲人排難解紛地方善舉如同善接嬰等事一經擘畫條理井然錢少宰寶廉重其才方思援引旋以病歿年四十六無子以從姪諸生玉潤爲嗣

崇部光

稿牙

沈森字奉璋號笏升議敘從九品工書法沈默寡言承辦積穀瘞埋諸善舉并襄理同善會毫不涉私生平好栽菊每至花時輒邀同人飲賞歲以爲常晚年續修家乘歷數寒暑而手鈔成帙支派詳明卒年六十五

參沈龍光來稿

陸慈祥字子漁賦性誠懇遭粵寇亂隨父經商至滬會母王病

楓涇小志

卷六

人物

三十一

劇剗股和藥以進卒獲瘳生平能周人急雖居滬地而於楓鎮公益事尤肯力爲贊助郁宗蕃等議重建黃良甫橋慨捐鉅金年五十五卒於滬臨歿猶遺命以婁邑田四十餘畝捐充楓涇嬰堂經費以助賑獎中書科中書加級給予五品封

典

崇部光來稿

沈守洮字修士廩貢生援例以訓導銓選生平工書法好飲愛交游妻父楊懋馨當湖名孝廉也主講楓溪書院居守洮家得其指授學日益進里有宗祠亂後幾廢與從姪椿助資修建祠克重興選授東陽訓導惜已先卒

葉世熊字夢飛號培卿幼讀書穎悟弱冠游青浦庠庚申之亂官軍屯守泖濱餉需不貲熊解囊以助事平大吏上聞得議



敘訓導三赴秋闈不售遂淡仕進生平事親以孝交友以信  
鎮有曹雪莊陳竹士二先生楓涇小志遺稿未刊熊偕許光  
墉費灃將舊稿增輯付梓一鄉掌故賴不湮沒其他纂家乘  
創嬰堂濬河道建宗祠義祠皆力任不辭光緒初松江府志  
青浦縣志先後續修採訪有功卒年七十三著有醉月居詩  
詞鈔葉氏支譜蒸里志畧行世

葉世騏字駿才號梅閣青浦拔貢生官碭山縣教諭善屬文工  
吟詠平居課士之外性嗜飲惟與二三僚幕銜杯唱和頗有  
彭澤高風丁外艱歸杜門不與外事越十餘年復選授崇明  
教諭未及赴任而卒年六十著有耐冷居詩稿

許光墉字侍庭辰珠孫附貢生少孤祖亡時年未及冠家多外

楓涇小志

卷六

人物

三十一

侮性堅忍卒能自立好讀書游庠後頗知發憤數赴秋闈未  
售母氏苦節事之克孝生平樂於爲善雲間書院捐田百畝  
分纂楓涇小志并助資付印惜年逾五十遽卒其友費灃字  
二川善庠生中年習幕維揚旣而改游滬瀆好交游凡戚友  
之相訪者靡不殷勤欸待楓涇小志之修灃亦與有力焉卒  
年六十四著有紫藤華館吟草

李鏜字竹雲性孝友十歲喪母哀毀如成人事繼母克孝侍病  
三月不解帶粵匪之擾父被擄日偕弟輩號泣於先塋父旋  
被釋人謂孝感所致承平後規復舊業闢舍旁隙地名曰潛  
園隨父游憇其中未幾父母相繼歿一以家事付弟輩躬行  
節儉里中規創書院慨捐田畝嬰堂告成雖不及見而門前



四樹猶鏃手植也生平好爲詩卒年六十五著有潛園詩存一卷行世

程世敏字明哉嘉郡增生性孝友敦氣節有古碩士風平居以實學課子弟不求仕進程氏自新安遷楓溪三百年未修家乘世敏旁搜博綜竭數年之力纂成一譜支派井然遂以積勞致疾卒年僅五十餘

沈椿字少譜嘉郡諸生援例授訓導署壽昌縣教諭改捐主事籤分刑部後改法部奉派赴日本訪查政務遠涉重洋不辭勞瘁請假歸凡里中公益事勇於肩任家有宗祠亂後幾廢椿竭力主持賴以重興北省水災慨捐綿衣千件蒙 獎樂善好施額後因細故爲四北區鄉民誤揣與從弟樞同被害於城

楓涇小志

卷六

人物

三十三

中

流寓

宋

陳壽博通經史建炎三年由汴京扈蹕南渡卜居清風涇紹興乙卯授慶元路州學政遷翰林著有周易附傳諸史辨疑四卷居易集六卷行世

殷羣字古溪娶曹學諭女居西小蒸至今呼其地爲殷莊仕宋至轉運使幹辦公事清慎不阿民受其惠

嬰志

邵桂子字德芳瀘安人咸鴻間以宏詞登進士第教授處州國亡不仕娶華亭曹澤之女因家西小蒸爲斯文領袖者四十年壽八十二嘗著忍默怨退四卦以自警子祖義官池州學



錄能詩工篆隸孫亨貞字復儒博通經史贈於文辭書擅四體凡陰陽醫卜之學莫不究其奧洪武初爲府學訓導以子累謫戍穎上者久之後終於橫泖年九十三著有蛾術集行

世善志

元

黃玠字伯成慈溪人清苦力學無所不通爲戴氏義塾師後卜居弁山年八十終於魏塘著有弁山小隱吟錄知非舊稿唐詩纂韻錄行世善志

明

孟觀亞聖五十四世孫祖忠厚扈宋南渡賜第姑蘇子孫遂爲吳人元末避兵風涇明初應人才詔授永甯縣知縣有治行

楓涇小志

卷六

人物

二十四

陸吳府審理副

善志

項聖謨字孔彰元汴孫自號胥山樵善畫山水亦精花草朱竹垞論畫推重之嘗寓楓溪求畫者屢滿戶外

國朝

黃上贊字士載新安人結褵未幾遭明鼎革挈眷遠徙途見兩女被寇追逐營不自顧爲匿之寇至僞指去路不獲而返知爲贖賣刃傷其頸喉幾斷卒獲免遂徙家楓涇

殷銘字警齋長洲人寓梵香林工詩與僧圓機爲方外交孫琮王之圻柏古時與唱和著有魏里詩存

徐穎柔字仲嘉華亭貢生師事焦袁熹舉業外並工詩古文薦舉博學鴻詞以兄疾不赴爲人諷然士大夫皆樂與之交乾



隆時嘗爲里中某紳館師暇輒與人唱和刊有楓溪吟一卷

行世

府志

沈恆坦字蘭修斜塘人乾隆癸酉舉人官泰順教諭以母疾乞養歸晚歲館里中吳氏問字者戶外屢常滿討論靡倦歿後詩文惜俱散佚

徐宏位字立人號白蕉山陰監生青藤道人渭之後裔耽詩酒暇則寫墨梅一枝意灑如也中年客游燕臺詩壇酒社到處逢迎晚歲寓楓涇與族弟維城及溪上諸同人相倡和惜無嗣遺稿多散佚僅存得樹軒詩鈔一卷

善志

謝洪恩字蘭舟號沐堂歙縣貢生宰甯河時歲不登倡捐俸米設粥廠以濟饑黎全活甚衆遞遷至廣平府知府降補同知

楓涇小志

卷六

人物

三十五

服官三十年以廉正著先是丁母憂卜居於鎮之近鄉罷官後一載而卒姪名益字子遷官河南汜水縣知縣

善志

王國章甯波人儻居鎮南以負販爲業事父孝父性剛喜怒不常少不稱意輒笞撻隨之國章跪受退無後言積數十年如一日父年九十八而終每一道及恆流涕不止

繆文彬號紫珊父東陽嘉慶初自紹興來遂家焉會市民以故相毆東陽往解之既而死一人株連論罪當徒彬年十五赴縣自陳以父老願代有司義之從其請人稱繆孝子云

朱爲弼字右甫號椒堂平湖人博學嗜古嘗館謝氏望雲樓樓藏書極富恣意披覽學日以進後成進士歷官漕運總督清介自持爲一代名臣



陳傳均字皋蘭祖居章典史橋嘉慶丁卯解元甲戌進士以庶常改官戶部主事擢郎中工制藝書法勁秀嗣母娶楓溪許氏依居母家因隨侍焉

汪家禧字選樓仁和庠生工制藝尤長古文寓里中游其門者多登高第事母至孝遠歸必肅衣冠而拜晨昏定省無或有間

倪驥字學圃石門人工寫照道光初寓蔡月潭家子耘字小圃能世其業並工花草詩無俗韻亦嘗寓鎮西程氏

卜葆鈞字達庵平湖人工文精詩賦道光時館顧氏里之好學者日以詩文相切磋受益不少後成進士官大邑縣知縣俞文治字秋萃善廩生專精時藝讀書寒暑不輟里人慕其文

楓涇小志

卷六

人物

三十一六

爭延至家塾子弟多所造就屢躋鄉闈士林惜之

蔡升初字可階德清人工寫照得曾波臣法用筆古秀傅色高雅非貌似者可比咸豐時寓鎮南關帝廟畜二白狸出遊必俱愛如子女人欲視之不肯輕示亦生平一癖也

新彙參墨林今話

陶洪字紹原號錐庵以字行秀水人工詩山水出入元明諸大家而於國初四王尤得陳髓書宗右軍咸豐時館楓涇程氏求畫者屢滿戶外既而避粵匪亂游楚數年同治初僑居鎮西未幾卒著有忠孝堂集

善志參墨林今話

楊振藩又姓伍字蕉隱陽湖廩貢生工詩古文詞尤善書畫嗜弈與錢塘屠倬婺源齊彥槐善咸豐初避粵氛挈眷來鎮寓謝氏適園里人多其藝樂與之交往灑脫不治生產時或不



舉火猶與家人拈韻對局意趣翛然嘗入雷侍郎以載軍幕  
贊畫機務洋洋數千言倚馬可待後以微員需次浙江與桐  
城吳廷康稱西冷二老著有蕉林著易編樂攷書原續書譜

蕭湘別館詩文稿碧霞仙館詞

善志參舉  
林今話

楊懋譽字酉麓號友鹿平湖乍浦鎮人道光辛卯舉人性豪邁  
喜吟詠工文能背誦漢晉諸史甫冠即蜚聲庠序年二十二  
登賢書七上春官六薦未售遂承光業遵旨採辦紫銅航  
海抵長崎倭人慕其才請業者衆後因粵匪竄浙捐資助餉  
當道保加直隸州州同銜旋避兵入都事平旋里寄居其壻  
沈守洮家主講楓溪觀海九峰等書院多所造就晚年猶手  
不釋卷所著文詞詩賦循先正法程詞名尤著采入國朝

楓涇小志

卷六

人物

三十七

詞綜遺有聽潮山館文集蕉雨山房詩稿卒年七十七

許汝珏字子湘魏塘北門外夜珠浜人附貢生博學工文同光  
間授徒鎮西王氏壻家從游甚衆晚年病風右臂不仁以左  
手作書月課書院仍不少輟其耄而好學如此

參陳銓  
稿以下  
新纂

慎葆霖字金門青浦諸生光緒初就館鎮西程氏提倡會課校  
閱敏捷學者樂從之一時多知名之士

同上

屠塏泉字爽亭秀水增生光緒初受里中郁氏之聘設帳多年  
工制藝喜談諧人樂與交家貧藉束脩膏火以自給中年患  
咯血症賣志以歿人多惜之生平尤愛古泉恆摩挲不輟

同上

朱昌灝字二樓華亭附貢生世居泖濱之吾舍

俗呼  
五厓

性和易工

詩古文辭每一藝出土林爭誦省試累薦不售晚年以醫名



於時賃居楓涇吳氏求醫者踵相接嘗有句云世味本甘人自苦俗情縱險我常夷其概可知也課子士才運堯均游庠以姪運新貴 她贈中憲大夫

參朱運新來稿

張曜字亮臣號朗齋大興籍世居錢塘咸豐初從戚鄰吳江柵賀臻於河南光州任所屬中州盜起提健兒守禦所嚮有功由知縣歷保至河南布政使改總兵 記名提督平捻首張總愚功 賞穿黃馬褂會陝回作亂移所帶嵩武軍西征大小百餘戰補授廣東陸路提督開隴肅清 賞戴雙眼花翎隨左文襄出關克吐魯番城 賞一等輕車都尉兼一雲騎尉世職西疆底定奉 旨幫辦軍務光緒十年入關錄敘邊功 賞頭品頂戴旋授廣西巡撫修濬京師城河役竣 賞

楓涇小志

卷六

人物

三十一八

兵部尚書銜改撫山東奉 旨幫辦海軍明年 賞加太子少保十七年以積勞卒官遺摺上 聞普贈太子太保照總督例 賜卹入祀賢良祠立功地方建立專祠予諡勤果 國史館立傳其未至河南也嘗寓楓涇程戚家年餘故十五年浙西水災助賑善邑五百金不忘舊游也

善志

沈開祺字筱圃婁諸生少孤家貧力學授徒自給館楓涇垂三十年所交皆一時知名士及門稱盛如葉理封王孝燧先後登賢書其他游庠食餼者未易更僕數也性灑脫工詩文尤善書法摹趙董能得其神似卒年五十六

參朱運新來稿

朱偁字覺未號夢廬秀水人援例授州司馬咸豐庚申粵寇擾禾中挈家避滬上生平工六法花草翎毛靡不各擅其長與



同郡張熊山陰任頤齊名從游甚衆得其指授皆有名於時  
光緒乙未丙申間遷居楓溪後仍返滬而卒年七十有三

藝術

宋

李甲字景元居華亭鄉自號華亭逸人善墨戲作逸筆翎毛有  
意外趣米芾畫史稱之蘇軾題其畫爲郭恕先後一人

善志

元

張觀字可觀松江人元末徙居清風涇少游江湖抗心希古畫  
山水師馬遠夏珪長於仿摹及見盛懋丁野夫而與吳仲圭  
游故其筆力古勁無俗弱之氣尤善鑒別古器物書畫性好  
硯卒後以硯殉葬

善志

楓涇小志

卷六

人物

三十九

明

陳以誠字處夢工畫梅五言律詩古淡可愛尤精醫永樂間以  
能醫薦入太醫院累從中使鄭和往西洋各國擢院判歸卒

於家

善志

顧憲字汝章號廉齋中明律科充藩司椽考滿不赴治醫術療  
疾輒效

胡齋初名浚字元海善龜卜其學得之同邑袁杞山後相約游  
金陵寓神樂觀提點姚一山偶失金杯酷責其徒二人憐之  
占得剝之頤告之曰金在土中未亡也汝第從房之西南隅  
掘下五寸則得矣如其言果得杯永樂八年一山薦二人於  
朝袁稱疾不往胡至京卜無不驗賜今名授欽天監刻漏博



士上新築殿命之卜布算訖跪曰某月某日午時當燬上怒囚之至期倩獄卒覘視返報曰午過矣無火胡遂服毒午正三刻殿果焚上急召胡已死矣甚惜之賜馳驛歸葬子四旻吳昱昂皆棄占筮以畫名曾孫昺名尤傳裔孫璋工文崇禎丙子副貢允滋康熙丙午武舉人昺與允滋俱有傳善志

孫復古字見心世習岐黃尤多心得求療者雖貧無酬資吉趨往診治寒暑晝夜不倦嘗與薛立齋王肯堂往復參究互相讚歎郡邑慕之登堂旌獎卒年八十餘次子文鋒有傳善志

胡昺字景明號松軒旻孫善畫工詩及寫真弘治間以畫士取入京師因病歸更號雪樵道人嘉興志

顧朝陞字贊勿善撰著錫山馬世奇微時撰得乾之五爻曰五

楓涇小志

卷六

人物

四十

屬君升陽在四四為淵君臨淵上當觀天顏於鳳池後馬果入詞林又遇異人授風鑑書嘗謂吳江周宗建昂昂如獨擊鵲但亂紋入口恐忠貞見妒天啓乙丑周罹璫禍由是世益神之善志

國朝

程之舜字豫庵國子生自新安遷之鎮遂家焉精繪事筆姿古雅而於翎毛花草尤擅長今巨幅尺燈猶有存者人爭寶之曾孫億有傳

顏經字愚山婁庠生善畫山水好游覽足跡半天下名山勝景悉圖以歸嘗畫九江圖十幅氣韻生動為時人所莫及曹小志

續入志



王勅字復亨父友六居清風里當明季絕意仕進以岐黃游寓  
王江涇勅亦習其業淵穆俊雅以詩酒自娛嘗與周青士往  
還唱和有西湖三泖廬山吉水道中諸作亦以術出游者也

西泠徐士俊為作片石山人小傳靈芬館詩話

黃韜葆字錦文狀質樸而善奕先是諸生唐齡字與三以弈名  
於時曾教之布子不數日即曰君敏妙若此始將為國手吾  
弗若之矣後韜葆詣松郡郡少年易之約每枰負者出銀若  
千韜葆欣然就局少年屢負時錢長澤擅弈為松郡冠乃浼  
長澤往纔下數子即推局而起少年強之終局長澤竟負一  
子自是韜葆名動公卿間與施襄夏范西屏並重惜無後不  
得其傳善志參妻志

楓涇小志

卷六

人物

四十一

柏立本字巖山古子諸生年未及冠精通畫理能入宋元之室  
為人磊落不與世俗伍嘗過涉園魏青城稱其高風秀骨英

采慧姿照耀泉石今世說采入妻續志

鄭崗字惠人號玉蟾邑庠生其先華亭人少攻書長習醫神妙  
子春回字荆輝庠生繼其業乾隆丙戌丁亥大疫食油菜者  
患咽喉多不治春回父本稱咽喉神手得其傳療之輒效著

有喉科源遠集參善志

徐霖字天三工巫術畫墨龍神妙莫測向以欸字不工為嫌今  
即欸字別真贗有獲之者爭寶之曹小志

張德佩字菊圃工花卉得惲南田筆意士大夫雅重之嘗游藝  
四方數十年故里中遺蹟甚少曹小志



畢大椿字澗雲號友松婁邑監生耽吟詠工書法善山水嘗客

董蔗林相國邸繪壽山圖長袖進呈 御覽邀 睿賞蒙

御筆題詩其上詩見宸翰 賜端硯一方歸而勒碑以誌 恩

遇著有半硯齋詩鈔雙續志

蔡廉字思韓遇異人授神仙術以符水刀圭療疾甚效有橘井

風嘉府志

陳如岡字晉笙以鐵筆得名所鐫碑帖較墨本無毫髮差梁學

士同書評為江浙第一手

黃世樞字一峯號淡淡主人善人物工山水性介不輕落筆嘗

於羅星臺關帝廟畫帝像生氣凜然有請懸壁以驅鬼怪者

夜聞刀戟聲詰旦見巨鼠死石上由是家有怪異爭請懸祀

楓涇小志

卷六 人物

四十一

卒年八十有一弟子陸春堂寫照亦神似魏塘人物志采入婁續志

錢式金字禹修號小洲居北塘涇善畫界書極精細平望翁海

琛見其潘安擲果圖嘆為神工非人力所能到曹小志采入婁續志

沈兆陞字魚山號芊柳喜彈琴考譜按弦月白江清時得古人

妙處亦工人物山水墨居續編采入婁續志

沈昌祚字花南泓裔孫工寫照神情畢肖兼善花卉

費季方佚其字善弈能以口談數子決勝負無毫髮差遂挾技

游四方名動公卿時推國手與同邑國子監典籍張延煦齊

名著有弈譜數卷惜佚而不傳婁續志

戴兆芬字誦清號臥雲工篆隸善梅竹有古趣為時所稱子公

望有傳墨林今話參嘉府志



蔡桂字山泉工書有時署山舟學士歎人莫辨真贋楓水詩存

盛韶字景夔號佐虞監生屢試不售棄而習瘍醫藝甚精少宰

錢樾贈以額曰春盎著有穎川集

高元眉字燕庭號似山稽子工詩文善書可與梁山舟學士相

頡頏並擅青綠山水頗得逸氣卒年八十有三墨香居畫識

顧簡字臨南善庠生畫山水松石各臻其妙壽七十有二

吳頤字鐵君屢困童子試遂棄舉業習繪事山水宗石谷與同

里戴公望齊名嘗繪楓溪八景圖青綠水墨各極其妙頗得

國初諸家筆意能於細密中得蒼潤之氣後人摹之皆不

及焉善志

沈泰字魯山工篆刻尤善銅玉章性喜雕琢多巧思凡手製器

楓涇小志

卷六

人物

四十二

皿因心造作無不精細可觀

程汝衡字雪航號松壑博雅多識好讀書工詞翰書法為董文

敏私淑弟子與柘湖馮硯農訂金石交性磊落不肯阿私卒

以窮困死人咸惜之

屠玉壘字銀宇號松圃居張涇匯先世遇異僧授秘笈以傷科

世其業至老益精求治者踵相接樂周人急又嘗傾囊治市

上街悉登以石行者便焉後因無子悉以田產分給貧族其

曠達如此

費晉康字錫蕃號愚泉精曉音律時持檀槽度新聲高妙絕倫

世罕其匹工畫並精醫以優游泉石終

程松字懋齋號又傳監生官淮南批驗所大使剔弊除奸商民



悅服工繪事每畫花草生面獨開尤長墨梅

孫鈞字楨青善山水宗麓臺寫真尤神似同時曹鼎字禹山亦善人物其寫真不用對坐一見其容後背摹酷肖尤工士女灑脫渾厚與雪溪費曉樓相埒

葉爾陽字寅瞻由洞庭山徙居於鎮精岐黃書法劉文清而得其神似善畫花鳥好作白頭翁人稱爲葉白頭

婁續志

黃鞠字鞠癡號秋士居惠安里善山水花草人物後挾策游吳門依戚戴公望會陶文毅公撫吳修滄浪亭成徵諸畫家繪圖俱不當意時鞠亦繪圖以進大稱賞延之幕中待以上賓自是名謀一時縑素堆積多冠蓋交遂家於吳築湘華館集諸名士繪圖題詠鞠並擅詩書筆姿秀逸庚申之變殉難於

楓涇小志

卷六

人物

四十四

吳

婁續志

吳成基字建時號東巖監生擅岐黃術從四明吳浩然游藝益精許廣文辰珠贈以句云不須遠聘秦和緩春在先生掌握中可想見其醫之善矣

費晉昌字邦瑞號吟荷監生議敘縣丞性穎悟工詩善畫好鼓琴凡寫花鳥蟲魚栩栩欲活爲人瀟灑不羈處戚族里黨間有仁恕風兄弟既分析弟家旋中落復與同爨道光己酉水災捐資助賑邑宰李輝德詳請撫軍獎以樂善不倦額著有白梨花館題畫草惜遭亂散佚

謝調梅字鹽卿號鼎臣字澄子官吉林伊通河巡檢畫承家學花草無弱筆山水得四王正宗精鐵筆善談諧後避兵滬上



日本人見其筆墨爭求之

許光第字次平號簞園好學工文小試十數次時婁邑人多額隘府縣試屢列前茅卒未一售人咸惜之家貧課徒自給門下頗有游庠食餼者生平工篆刻私淑種榆仙館能得其法遭亂流離悒鬱以卒

新補

葉世業字曉樓國學生淵懿誠慤居動不佻工小楷善刻竹遭髮逆之亂憂憤成疾卒從弟世安字子蓮爲人溫厚不佻繪花草蟲鳥惟肖惜年方弱冠積勞而歿

屠慶泗字濱樵玉壘姪孫州同銜工書善繪事曉音律庚申之難家資蕩然出其先人緒餘以醫鳴於時

張國治字子瑜官青浦縣主簿好吟詠尤精於醫著有傷寒金

楓涇小志

卷六

人物

四十五

賈合編歌註八卷本草註釋四卷枕中訣四卷石經書屋吟稿兩卷

陸應祥字靜濤性蕭灑工繪事自遭粵寇遷居滬上愛名人書畫搜羅富有所交如王秋言張子祥任阜長伯年朱夢廬錢吉生諸人皆一時巨手春秋佳日就所居補石山房相與飲酒賦詩以爲樂生平最精山水直追四王兼畫花卉人物亦

頗雅秀卒年七十餘

以下新纂

沈標字香谷年七歲見祖母金文沙繪事輒侍立其側遣之不去往往凝神默識閱數年略得大凡時文沙年高目眊所作文山水中之房屋人物恆倩繪而潤飾之故標年弱冠即以山水名晚年更進



程培蒙字養初善庠生性和而謹淡於進取中年棄舉業攻醫從孟河馬文植游得其傳既而僑寓當湖求治者屢盈戶外生平最精奕幾爲國手松嘉兩郡無與之敵者故與之訂交皆一時名雋之士年未五十卒人共惜之

費之潤字藝芳晉昌姪幼患咯血症遂棄儒服賈非其志也後遭亂離乃改習繪事從秀水朱僊游得其指授畫日益工性灑脫好飲愛交游不喜羈縛故終身不娶卒年六十有九

沈杖字華農號碧山秉性清雅工繪事暇輒畫山水人物以自娛尤好仿古人有攜名人手蹟以示之者朝夕臨摹靡不酷肖故里中遺幅尙多

參沈龍光來稿

尤施賢字頌臣本姓施父娶尤氏舅無嗣因承其姓善庠生精

楓涇小志

卷六

人物

四十六

醫習瘍科工畫人物善摹陳洪綬筆姿古雅並擅花鳥幾與山陰諸任相埒故遠近爭求之且好交游雖無潤資無不濡染以應處地方事亦勞怨不辭德星橋圯募貲重建賢與有力焉卒年五十八

宦績

孫俊奇字國珍順天三河人由吏員授主簿地與婁邑接壤作奸者每藉爲逋逃蔽俊奇擒治不少貸佐兌邑漕旗弁懾服操守廉介卒於官囊無餘資

善志

黃浩字畫峯江蘇長洲人嘉慶時任主簿遇訟無大小務以情理諄諭令止至有因貧涉訟者間出俸錢以解之故感激從善者衆嘗行郵至一村遇丐呼諭曰汝年少手足不殘廢奈



何至此耶丐感泣曰惟命是從浩界以千錢營生遂獲所終  
道光二年乞告歸部民有送至家者魏塘人  
物志  
成其謀字慎庵四川人道光時任巡檢建義祠懲不法有惠政  
焉

程德滋字樹齋湖北天門人道光時任巡檢懲無賴善良以安  
餘如濬市河築石堰民俱德之

李植字棟隆號頌亭奉天人道光時任主簿俗多浮厝棺木歷  
久朽壞植集里人捐貲爲瘞埋之舉時同善會以經費不敷  
幾廢植延郁道銘等數人司其事酌定規條得垂永久其力  
居多

徐廣緒字子容號逍遙江蘇沐陽人道光時任主簿有貧佃負

楓涇小志

卷六

人物

四十七

租法當筭年甫十五號泣畏刑廣緒憐之給錢以償性灑脫  
工詩畫有石田風名載墨林今話

童復字茂園浙江山陰人道光季年任巡檢未幾粵氛漸熾盜  
賊蠱起集里人嚴守望督支更並治水陸各柵以時啓閉境  
賴以安性瀟灑暇則以八法自娛力摹松雪亦能詩偶有題  
詠皆清麗可誦

張學廣字孟皋號麓田直隸遵化人咸豐初任主簿禮士愛民  
暇蒔花草放懷自適有吏隱風善丹青尤工花果求者接踵  
後以俸滿晉省值城陷遇賊不屈自縊殉難嘉府志

吳膺熙字鴻汀福建侯官人光緒三年任主簿凡地方利弊恆  
商諸紳士以興革之又嘗倡捐集資舉辦瘞埋八年秋櫻疾



數月瀕危其妻某氏知必不起先仰藥死不旬日廣熙亦卒囊橐蕭然里人哀之助資以歸其櫬

阮維勤字仲補江蘇奉賢人光緒八年任主簿初下車與紳士交間有齟齬者然心實無他生平工書畫好吟詠並精眼科人求其治不取酬資於地方利弊亦克留心歷任十四載調嘉興主簿去有留別詩四章人皆誦之

王壽峯字槐蓀福建長樂人光緒季年任巡檢與地方紳商交接無仕宦習氣故人皆樂與往來時水鄉多盜上游派徵兵數百人分守鎮之南北適梟匪夏竹林率槍船數十過楓意圖劫掠徵兵出與交戰壽峯亦隨同督隊遂將梟首夏竹林擊斃餘匪四散境賴以安壽峯與有力焉卒後闔鎮士民請

楓涇小志

卷六

人物

四十八

入名宦縣中限於例尙未申詳

方外

梁

張半山蜀人天監元年來鎮指仁濟道院址曰此福地若建道院民安物阜居民不之信夜聞鐘鼓聲異之因捐資建院道風大振

唐

德誠常乘小舟往來松江洙涇以綸釣度日因呼船子和尙妙常庵經兵燹繙素挹其道化結廬請居而斯庵藉興著有撥棹歌二十九首呂益柔序而刻之

善志  
略異

宋



契嵩藤州人著原教論韓琦歐陽修等皆尊禮之嘉祐中陳舜俞捨宅爲光德庵延嵩焚修其中熙甯四年說偈曰後夜月初明吾今喜獨行不學大梅老貪聞碩鼠聲立化去橋李詩繫朱太初仁濟羽士也宋高宗以太初修薦皇妹齋事畢賜田五十畝供高王廟祀

明

許拱盟修真仁濟道院巡撫侍郎周文襄公忱以其誠恪每過

輒艤舟與譚元理解稱其行真道熟爲羽流中翹楚

節善志

尹蓬頭佚其名寓仁濟道院精通郭璞書卜宅兆相陰陽每有奇應得仙人指授後騎鐵鶴而去里人顧遜有詩紀之

普明字寂照鎮東闕氏子人呼闕和尚披薙妙常庵後居杭之

楓涇小志

卷六

人物

四十九

西山每靜坐蛇鼠鳥雀嬉其前客至輒納諸懷以衣覆之晚年歸庵嘗語弟子曰待桂子香我西遊也至期弟子來送明方持帚掃地曰汝不來我幾忘矣遂鳴鐘集衆作偈而化茶毗時火光五色香聞數里獨舌不灰人咸異之馮猶龍袁黃

各有碑記

善志參曹復元墓修疏

真可字達觀號紫柏禪師吳江沈氏子嘗居光德庵五歲不語有異僧過其門摩頂謂之曰此兒出家當爲人天師言訖不見遂能言兒時志氣雄放行腳四方萬曆壬辰至石經山得佛舍利玉函聞於慈聖太后賜紫伽黎迎供後妖書獄起以言者波及逮入詔獄當事欲中以法真可聞之謂侍者曰吾去矣索浴說偈而逝著有紫柏老人集十五卷行世

魏塘詩陳



方明

魏塘詩陳作明方

字石雨號佛日靜慧禪師俗姓陳奉賢鄉人幼

讀書了大義父母沒投法相西生師薙染一日念佛甚切忽擲魚子笑曰不特西方可生東方亦可生矣師曰未是汝到家處已隨本師參雲門得力付斷拂一枝自號斷拂子嗣為洞宗三十三代繼謁黃蘗有禪師有闢邪說傳於叢林

啓續條款

國朝

朱潛修字養真玉虛觀道士也濟惠驅邪屢有功德康熙二十三年里人為具稟張真人府封土地真官

本冲字息庵四明楊氏子母夢老衲授橘而孕少至孝性穎悟明天啓丙戌依天童宏覺薙度受具徧參叢席主五峯寺衲子響應移錫般若園後住鎮西圓明庵康熙四十四年南

楓涇小志

卷六

人物

五十

巡迎 駕雲間 召對稱 旨 恩賜優渥其謝表云臣僧

生年八十有三分至愚濫竽禪席恭遇 聖駕南巡 駐

蹕松江伏惟我 皇上仁孝聖慈永思 世租章皇帝因念

宏覺先師遂及臣僧本冲與行瀾於三月二十八日 召見

賜坐 賜茶 御製詩扇二十九日同進 行宮蒙 皇

上賜齋後 賜臣僧本冲 御書性覺寺匾額淨域長齡匾

額暨對聯一副經卷三部四月初一日臣僧自楓涇送 聖

駕至嘉興蒙 諭侍臣引臣僧過 御舟 賜硯一方 天

語眷注至隆至渥真千載罕有之遇臣僧衰邁無狀獲此異

數退自思維汗流浹背不知所從惟有頂禮 宸書花雨護

龍迴鳳翥珍藏 御製香雲擁春藻天葩祝 聖壽於無疆



祈時 巡於弗替其 恩遇之隆近世少有明年秋沖沐浴

跌坐而化 善志 參謝表

戒開 雙志 開作闕 字解三客都閱藏二次胸中自是不凡詩文短札

精倩入神亦善畫筆墨沈厚不亞惲本初其歛託名姜睿 繪圖

寶鑑 參 墓志

際智字慧力嘗卓錫於定慧寺苦志焚修跌跏達旦募册一展

衆競檀那禪堂佛殿整頓重新智秉性高潔律行謹嚴嘗延

施斛食輒有奇驗 善志

婁近垣字朗齋居惠安里爲仁濟道院羽士性警悟自教典外

博涉經史壯歲禮龍虎山事三華院道士周大經授五雷法

及丹經玉訣之秘雍正五年入都 詔命禮斗 上嘉其誠

楓涇小志

卷六 人物

五十一

賜字曰三臣授上清宮四品提點 欽安殿住持鑄印

賜之九年三月發內帑 命督修龍虎山上清宮十一年

詔封妙正真人住 大光明殿乾隆初 覃恩 錫三品封

典 贈近垣祖父如其秩先後 錫賚不可勝記洵不世之

榮也奉 命禱雨祈晴無不立驗故 上器重之垣雅尙沖

靜大塗而有少壯之姿工詩瀟灑絕俗輯龍虎山志十六卷

簡明有法年八十九卒於京師之妙緣觀事 聞 賜銀百

兩治喪後其徒奉遺命葬龍虎山之富潭于文襄誌其墓 善

兩志 參江 西貴 溪志

元德字願宏俗姓戴年四十喪偶受具於金粟石庵誦法華經

至一切維心語輒大悟薙髮性覺寺苦志焚修預知逝期跌



坐說偈而化

善志

梵生梵香林僧苦志焚修專心淨業者五十餘年預知示寂期書偈端坐而化其徒圓機字南宗黃山人善畫竹工詩著有梵香林詩鈔六卷

峨雲峨岫庵僧能詩工畫善鼓琴

萬年窮茶亭僧肩耒手鉢蠢蠢然縑而農者也嘗於厠間拾得銀十餘兩坐待還其人非笑者以爲獲銀不有必窮到萬年也因溷以爲號平時檢拾字紙甚勤人愛其誠多所布施以其餘散諸貧者而窮如故一日徧辭檀護曰某日衲往好處去矣至期視之沐浴端坐而化

善志參天咫錄

貫庵海慧寺僧工書法能詩重建精進閣爲誦經焚修所僧圓

楓涇小志

卷六

人物

五十二

機贈以詩云松下幽人信奇特少小業儒壯爲釋八行寫就追晉唐七字吟成歷元白蓋紀實也

道詒俗姓陳農家子性慧直聞鄰童習章句輒厭薄之縑梵筴乃如素習遂爲僧住持福善庵有漂榆大賈持千金來曰爲吾師供養乞誦楞嚴百卷問何用曰藉以鎮壓海舶風濤卻其金爲誦經如數道光二十一年謂弟子曰大海一漚我將逝矣遺命茶毗觀察陳大溶謂其卓行異凡僧勒石爲記

志

府嘉

蘊空字仰廬陸氏子披薙化成庵能詩時有佳句

玉崑字覺山俗姓袁出家定慧寺嗣主登雲方丈既而飛錫金山之靜芳庵數年會鎮北之海慧寺募修主僧延崑至發願



閉關未及三載粵寇至遂棄去辛酉春被擄入城逼令蓄髮  
不屈自剄死

善志

孫久傳字仁山爲玉虛觀道士曾詣龍虎山無所遇而歸凡作  
祈禳事其誠可嘉遠近羽流皆尊敬之並擅青烏術

覺峙字淦泉浴姓李出家定慧寺從謂仁和尙披薙師卒不願  
常家索居靜芳庵自甘清苦嗣見西隱房蕭索乃接辦常住  
整頓禪規庚申之變棲託北鄉東徐廟事平仍歸西隱重建  
平屋三楹潔志焚修夜臥誦經仰見屋梁大放光明遂於光  
緒二年六月四日圓寂先三日囑徒孫祖望預備後事至期

果逝

以下新纂

眞通字勤參俗姓顏本故家子道光季年忽厭棄塵俗祝髮於

楓涇小志

卷六

人物

五十二

海慧寺之笑塵山房乙卯歲受戒楞嚴寺後本寺方丈乏人  
住持各護法推主講席時寺已傾圮立志興修沿街叩募不  
避風雨者三閱寒暑已有善信慨許施助方欲鳩工適遭庚  
申之劫殿宇禪房付之一炬而此事遂不可問矣壬戌至泖  
濱之澄照寺權作羈棲時軍門黃武靖公駐師其地相見契  
洽命通超薦陣亡將士囊貲漸積蕩平後仍歸海慧得將林  
野堂丹葵山房精進閣次第建復寺賴重興卒年六十

空航字守傳俗姓董住持定慧寺西南房遭亂後僧寮俱毀空  
航積誦經資重構數楹爲駐錫所朝夕虔禮檀越信從性至  
孝母老無依迎養寺中後移主城中慈雲方丈數年卒返定  
慧而歿



